

Umiarsualiviit pillugit Inatsisartut inatsisaat nr. xx, xx. xx 2015-imeersoq.

(Ineqarnermut, Sanaartornermut Attaveqaqatigiinnermullu Naalakkersuisoq)

Umiarsualiviit pillugit inatsisartut inatsisissaata matumani oqaluuserineqarnissaani saqqummiunneqartoq pillugu Partii Naleqqamiit oqaaseqarfigissavarput.

Nunatsinni ineriartornermi avataaniit eqqusuinermi annissuinermilu, umiarsualiviit pingaaruteqartorujussuarmik inissisimapput, aalisarnikkut, pilersuinikkut, sanaartornermi, kiisalu ulluinnarni inuussutissanik pilersuinermi aammalu ilaasunik angallassinermi, minnerunngitsumillu nunatta avataaniit tikinneqartarnerani, avammullu niuernermi aqqusaartugaasarput pingaaruteqarluinnartut.

Ulluinnarnimi inuunitsinnut pingaaruteqartorujussuusut ilisimavarput, tassami ulluinnarni atuinermi kalluartagaat akinut tunngasut, aammalu inuussutissarsiornikkut allarpassuartigullu aningaasarsiornitsinnut inuussutissarsiornikkut kiffartuunneqarnikkullu pingaaruteqartorujussuusarmata.

Taamaattumik pitsaasumik sinaakutissalimmik umiarsualivinnik aqutsinissarput inatsisinillu pitsaasunik tunngavilimmik tunngavilersorluakkamillu pilersitsivigissallugu suliarineqartariaqarpoq. Kisiannili uani ilaatigut ersarluttunik tikkuussisunik tunngavissaqarluta aalajangersaaniarpugut tamannalu soorunami pitsaasuungilaq taamaattussaangikkaluarlunilu.

Kommunit umiarsualivinnik peqataallutik pilersitsinnaanerat qanoq kinguneqarsinnaanersoq ersarissumik paaserusunnarpoq. Neriutigarpullu umiarsualivinnik nutaanik sanaartornermi nunarput tamaat ataqatigiissakkamik ingerlanneqassasoq. Tassami ataqatigiissaarisooqanngippat aamma ineriartorneq killup tungaanut aallarsinnaammat.

Sinerissami sumiiffinni unammilleqatigiinneq nakkutigilluarneqanngippat talittarfiit namminersortunik kommuninit Namminersorlutik oqartussanik pigineqartut akornanni naligiinngitsumik unammillerfiusinnaanera, taamatullu pisoqassappat akiliisussat ataasiupput tassalu atuisut tamaattumik sinaakutissat ersarilluinnartut pilersinneqartariaqarput.

Tassami sinerissami umiarsualiviit eqqarsaatigissagaani ineriartorsinnaanerit killeqartorujussuannorsinnaavoq, tamannalu aamma unammilleqatigiinnikkut equngasumik inissisimatitsilersinnaasoq ernumagalugu Partii Naleqqamiit oqaatigissavarput.

Sinerissami illoqarfiit nunaqarfiillu umiarsualiveqarnikkut pisariaqartitaat aamma annertuujusut tamatta ilisimavarput. Umiarsualivinnik inatsisartunut siunnersuuteqartarnermi amerlasuunik akineqartarpugut pingaarnersiulluni sanaartugassat illoqarfinni nunaqarfinnilu tulleriarinerit malillugit ingerlasoqassasoq.

Tassani avannaani Uummanaq, Ilulissat Upernavillu siullernut ilaasut eqqaamavarput, taavalu nunaqarfinni Saattut aamma periarfissalinnut siullernut ilaasut. Taamatullu aamma Kullorsuaq assorujussuaq talittarfimmik pisariaqartitsivoq massakkullu talittarfiat isumalluutissaanngilluinnartoq oqaatigigaani pitsaaneruvoq.

Taavalu aamma Kangaamiut talittarfeqarnikkut ajorluinnartumik atugassaqarfiuvoq. Piffissamilu kingullermi innuttaasut naammagittarunnaarlutik nalunaartut atsiorderillu katersorneqarsimasut Angallannermut naalakkersuisumut tunniunneqarput. Taavalu Naalakkersuisoq aperusunnarpoq qanoq iliuuseqassanersoq Kangaamiuni talittarfik pillugu?

Nunaqarfiliartaatit nioqqutissanik usinillu assartuisussat nutaat tikisinneqartussat nunaqarfippassuarnut talissinnaanngivissut atorneqalertussaapput, taamaattumik nunaqarfiit tikiqqartartussat aamma naleqqussaaffigalugit umiarsualivinnik aallussisoqarnissaa kissaatiginarluinnarpoq.

Tassami uani inatsissami takusinnaavarput nassiussat umiarsuakkut assartukkat nunatta avataanersut, taamatullu aamma nunatta iluani assartugassat, pinngitsoorarik Nuummi katersorneqartalissasut.

Aatsaallu Nuuminnganiit sinerissamut, aammalu sinerissamiit Nuummukaateriarlugit aatsaat avammut nassiussasat soorlu aalisakkat avammut tunisassiassat Nuummi nioriarlugit imarpikkoortaatitut ikineqartassallutik.

Tamatumalu kingunissai tassaapput qularnanngitsumik aamma akit qaffasinnerusut akilersorneqalernissaat. Tassami inatsisissami uani takusinnaasarput tassavoq akit qaffasinnerulernissaannik oqariartuuteqarneq. Siornatigummi oqaatigineqartaraluarpat Nuummi umiarsualivimmik nutaamik sanaartornikkut pilersitsinikkullu nunatta sinnerani sukkanerusumik akikinnerusumillu assartuisoqarsinnaasoq kisianni taamaanngitsoq takusinnaalerparput.

Uani inatsisissami saqqummiunneqartumi akinut tunngasut inuiaqatigiinnullu sunniutigisinnaasai minnerunngitsumillu aamma unammilleqatigiinnermut tunngasut kinguneqaatissai qanoq ittuusinnaanersut qularnaatsumik paasisaqarfigisariaqarpagut. Tamannalu siunissami aningaasarsiornikkut aamma inissisimalluanngikkutta taamatut isikkoqariartuinnarpat uagutsinnut ilungersunartumik pitussinnaanerput aarlerinartorujussuummat.

Tassami takusinnaasarpur malillugu inuussutissarsiortut umiarsualiveqarfinnik atuisutur pingaaruteqartut atuisut akiliutissaanik akiliisitsinerit annertunerpaartaat nammattussaavaat. Tassa qanorluunnit pisoqaraluarpat umiarsuarnik assartukkat akiisa qaffangaatsiarnissat misigissavarput tamannalu sorpassuarnut kalluuttussaavoq sinerissamut nassiussat, aammalu imarpik ikaarlugu nassiussanut.

Umiarsualiviit pisortanik aamma namminersortunik pigineqartut assigiinngisitaartumik akeqartitsinermi inuiaqatigiinnut sunniutaasussat pillugit misissueqqissaarneq takusinnaangilarput, kingusinnerusukkullu akit qaffaneqarnissaat ilanngullugu takussutissaqartariaqarpoq kisianni taamaattoqanngilaq tamannalu aaliangersaanissamut assut killeqartitsivoq.

Tassami oqaatigineqarpoq sunniuteqarluartumik unammillernerit ingerlanneqassasut pisortat namminersortut, kommunillu akornanni, tamannalu pisortanik tapiissuteqarnikkut pissanngitsoq.

Tassuuna takusinnaavarput taava atuisut akiliutaat qaffasissumik inissisimaleratarsinnaanerat tikinneqarsinnaasooq tamannalu atuisunut akinik qaffaanikkut matuneqassappat ilungersunartumut akiliutit qaffanneqarnerinik kinguneqartussanngortut.

Aalajangersaanissamut tunngavissat akillu qaffaneqarsinaaneritut tunngasut ersarissumik nassuiarneqarsimanngitsut qaqugu ersarissumik nassuiaatigineqassanersut Naalakkersuisunut apeqputigissavarput akineqarnissaallu kissaatigalugu.

Una suliassaq annertummat, tamattalu nunatsinni najugaqartugut sunnerneqartussaagatta ersarissunillu tunngavissanik amigaateqarmat, ilaatigut kinguartinneqarnissaa kissaatigaarput.

Tassami inatsisiliorsinnaanngilagut sunniutissai kalluagassaalu sukumiisumik ilisimanagit. Aningaasarsiornikkummi killiffippur ilungersunartorujussuuvoq, akiliisinnaanerpullu sipporlugu akilersuisinneqarsinnaanngilagut tamannalumi ilumoorpoq.

Aningaasivimmi imaqqanngitsoq allanik attartuinnarnikkut inuussutigineqarsinnaanngilaq!

Hans Enoksen